



Salomon regnant sur Israël prend femme, fait sacrifice és hauts lieux, & obtient de Dieu sapience, richesse & gloire.

SALOMON se voyant Roy pacifique sur Israël, print à femme la fille de Pharaon Roy d'Egypte, qu'il amena en la Cité de David, iusques à ce que les edifices par luy commencez fussent acheuez, à sçauoir son Palais Royal & la maison du Seigneur, avec les murailles de Ierusalem. Or il n'y auoit lors aucun Temple edifié, parquoy les Israélites sacrifioient és hauts lieux, comme aussi y sacrifioit Salomon, & y offrit mille Hosties pour holocauste. & des parfums sur l'Autel de Gabaon, qui estoit lors le plus grand des hauts lieux. Et depuis aduint que le Seigneur s'apparut de nuit en songe à Salomon, disant; Demande-moy ce que tu voudras, afin que ie te le donne. Et Salomon répondant luy dist, Puis que tu as fait tant de faueur & misericorde à David mon pere, & que tu m'as élu pour posseder son thrône, & iuger ton peuple, qui est innombrable. Or afin que ie m'en acquitte, donne moy donc Seigneur, vn cœur docile à comprendre science, pour discerner le bien du mal. Cette requeste pleut tant à Dieu, qu'il luy octroya, non seulement science, mais richesse & gloire en telle abondance, qu'il surpassa tous ceux qui ont esté deuant & apres luy.